

'E ccorne

Ognuno 'e nuie nasce cu nu destino:
'a malasciorta, 'e vvote, va..., po' torna;
chi nasce c' 'o scartiello arreto 'e rine,
chi nasce c' 'o destino 'e purtà 'e ccorne.

Io, per esempio, nun me metto scuorno:
che nce aggio 'a fa' si tarde ll'aggio appreso?
Penzavo: sì, aggio avuto quacche cuorno,
ma no a tal punto de sentirme offeso.

È stato aiere 'o juorno, 'a chiromante,
liggènneme cu 'a lente mmiezo 'a mano,
mm'ha ditto: «Siete stato un triste amante,
vedete questa linea comme è strana?

Questa se chiamma 'a linea del cuore,
arriva mmiezo 'o palmo e po' ritorna.
Che v'aggia di', carissimo signore;
cu chesta linea vuie tenite 'e ccorne.

Guardate st'atu segno fatto a uncino,
stu segno ormai da tutti è risaputo
ca 'o porta mmiezo 'a mano San Martino,
'o Santo prutettore d' 'e cornute.

Senteno sti pparole 'int' 'o cervello
accumminciaie a ffa' mille penziere.
Mo vaco casa e faccio nu maciello,
pe' Ddio, aggia fa' correre 'e pumpiere.

«Ma no... Chi t' 'o ffa fa'?»
(na voce interna mme suggerette).
Lieve ll'occasione.
'E ccorne ormai songhe na cosa eterna,
nun c'è che ffa', è 'a solita canzone.

'O stesso Adamo steva mparaviso,
eppure donna Eva ll'ha traduto.
Ncoppa a sti ccorne fatte 'nu sorriso,
ca pure Napulione era cornuto!».